



Sarajevo, 21. 3. 2024. godine
MEDIJIMA

SAOPĆENJE ZA MEDIJE

Evropska komisija pozdravila napredak BiH i pozvala na ubrzano provođenje reformi i usklađivanje zakonodavstva s propisima EU

Provođenje Zelene agende za Zapadni Balkan i Strategije usklađivanja propisa pravnoj stečevini Evropske unije u oblasti zaštite okoliša Bosne i Hercegovine, usvajanje cjelodržavne strategije zaštite okoliša, jačanje administrativnih kapaciteta i bolja međuinstitucionalna koordinacija, neke su od preporuka sa sedmog sastanka Pododbora za promet, energiju, okoliš i regionalni razvoj između EU i BiH, koji je održan 21.3.2024. godine. Sastankom su kopredsjedavali Mirza Hujic, pomoćnik ministra u Ministarstvu vanjske trgovine i ekonomskih odnosa BiH i Barbara Jésum - Gimeno iz Opće uprave za proširenje i politiku susjedstva Evropske komisije.

Evropska komisija je pozdravila napredak BiH i naglasila da je potrebno provesti reforme i dodatno uskladiti domaće zakonodavstvo s propisima EU u oblasti upravljanja vodama. Od BiH se očekuje da usvoji cjelodržavne strategije upravljanja otpadom i za efikasnu borbu protiv zagađenja zraka, te uspostavi koordinisane i funkcionalne mreže za praćenje kvaliteta zraka u cijeloj zemlji.

Na sastanku se razgovaralo i o usklađivanju propisa s Direktivom EU o smanjenju nacionalnih emisija određenih atmosferskih zagađivača, odnosno Direktivom o industrijskim emisijama, i uspostavi funkcionalnog Registra ispuštanja i prenosa onečišćujućih tvari. BiH treba poduzeti značajne napore na usklađivanju i provođenju pravne stečevine EU o buci u okolišu u cijeloj zemlji i provesti mehanizme za zaštitu prirode i bioraznolikosti.

BiH bi, također, trebala nastaviti napore na uvođenju Evropskog jedinstvenog broja hitnih službi 112.

Članovi delegacije BiH su informisali Komisiju o implementaciji revidirane Strategije prilagođavanja na klimatske promjene i niskoemisionog razvoja za BiH i Nacionalnog plana prilagođavanja klimatskim promjenama. Prioritet je da bh. vlasti donesu zakon o klimi na državnom nivou i poduzmu hitne aktivnosti na usklađivanju propisa s klimatskom politikom EU i primjeni Mehanizma za monitoring, verifikaciju i izvještavanje (MRV), kako bi osigurali uvođenje Sistema za trgovinu emisijama (ETS).

Nadalje je istaknuto da je za BiH od velike važnosti imenovanje Državnog IPA koordinatora, donošenje cjelodržavne Strategija regionalnog razvoja i implementacija regionalne razvojne politike.

Komisija je ohrabrila BiH da brže ispunjava obaveze iz Ugovora o prometnoj zajednici, intenzivira napore u provođenju reformi u područjima prometa i energije i da usvoji strategiju inteligentnog transportnog sistema. Pozdravljen je napredak u cestovnom prometu i naglašena potreba uspostave vodeće Agencije za sigurnost cestovnog prometa, kao i daljnja reforma i modernizacija željezničkog sektora.

Delegacija Evropske komisija je pozdravila do sada poduzete korake i istakla da je potrebno nastaviti s reformama u vezi s usklađivanjem i provođenjem Trećeg energetskog paketa EU-a za plin, Paketa integracije električne energije i Paketa čiste energije. Komisija je pozvala BiH da nastavi s usvajanjem integrisanog Nacionalnog energetskog i klimatskog plana.

Delegacija BiH je informisala Komisiju o poduzetim aktivnostima u vezi s izgradnjom skladišta radioaktivnog otpada na lokaciji Trgovska gora. Istaknuto je da BiH neće odustati od ranijih stavova i da od Komisije očekuje aktivnije uključivanje u rješavanje ovog pitanja.

Direkcija za evropske integracije